

Bank Islam catat keuntungan RM683 juta tahun lalu

KUANTAN - Bank Islam Malaysia Bhd. (Bank Islam) merekodkan keuntungan sebelum cukai dan zakat sebanyak RM683 juta bagi tahun kewangan berakhir 31 Disember 2013.

Jumlah tersebut merupakan peningkatan sebanyak 18.8 peratus berbanding RM600 juta yang dicapai pada tahun kewangan sebelumnya.

Pengarah Urusannya, Datuk Seri Zukri Samat berkata, pendapatan Bank Islam sepanjang tahun tersebut telah melepas paras RM2 bilion iaitu sebanyak RM2.2 bilion.

Menurut beliau, prestasi itu hasil daripada pertumbuhan kewangan yang kukuh, penawaran produk kompetitif, peningkatan

BANK ISLAM

jumlah deposit yang berterusan menerusi akaun semasa dan akaun simpanan serta kualiti aset yang bertambah baik.

"Portfolio pembiayaan meningkat sebanyak 21.7 peratus kepada RM23.7 bilion dipacu oleh permintaan kuah daripada sektor isi rumah.

"Jumlah deposit turut bertambah sebanyak 14.4 peratus kepada RM37.3 bilion dengan akaun semasa dan akaun simpanan membentuk 39.1 peratus daripada jumlah keseluruhan deposit setakat bulan Disember 2013," katanya.

Beliau berkata demikian

semasa sidang akhbar sempena pelancaran Kad Debit Universiti-Bank Islam (UniDebit) di Universiti Malaysia Pahang (UMP) dekat sini semalam.

Hadir sama Naib Canselor UMP, Datuk Dr. Daing Nasir Ibrahim dan Pengurus Visa Malaysia, Stuart Tomlinson.

Zukri menjelaskan, kad tersebut menawarkan kemudahan perbankan asas seperti pengeluaran tunai, pemindahan wang antara bank dan transaksi dalam talian.

"Kami berhasrat untuk meluaskan penawaran kad tersebut ke universiti-universiti lain di seluruh negara, diikuti dengan Universiti Pendidikan Sultan Idris pada Mac atau April ini."



ZUKRI (dua kiri) menyerahkan replika Kad UniDebit kepada Daing ketika majlis pelancaran kad itu di Kuantan semalam.